

## 2 Thessalonians

Paul-ele ayeye nhenhe arrpenhe anteme  
intelhe-ileme Ngkarte-kenhe areyeke  
apmere akngerre Thessalonica  
ikwerele-arle anerrirremeke

<sup>1</sup> Ayenge Paul, Silas uthene Timothy uthenenge aneme. Anwerne pipe nhenhe intelhe-ileme Ngkarte-kenhe areyeke apmere Thessalonica-le-arle anemeke. Arrantherre ingkirreke Ngkarte-kenhe aneme, Jesus Christ Alartetye anwerne-kenhe anteye.

<sup>2</sup> Anwerne Ngkarteke akwetethe angkeme arrekantherre nhenge Jesus Christ Anwerneke-artweyele Ratherre arrenhantherrenhe akwete mwerre atnyenetyeke arrantherre mwerre anetyeke nhenge Ratherre arrenhantherrenhe mwantye-mwantye iletetye, arrantherre mwerre atyenpe anetyenhenge.

*Nhenge Jesus apmere ahelhe nhenhe-werne apetye-alpemele, re tyerrtye areye akalkelhe-iletienhe itirremele*

<sup>3</sup> Arrantherre Jesus Christ Alartetye akwetethe arratyte itelareme, arntarnte-arerremele arrekantherre-arrpe. Alakenhe ikwerenge anteme arrantherre anwernenhe akangketyeke mpwareme nhenge anwerne Ngkarteke angkerlenge. Anwerne akwetethe Ngkarteke akangkemele angkemele arrekantherre, arrantherre-arle Ngkarte arratyte itelararlenge awethe-ame-awethe. <sup>4</sup> Nhenge anwerne tyatyte-werne alhemele, anwerne tyerrtye arrpenhe areye ileme nthakenhe-arle arrantherre Ngkarte arratyte itelaremenge. Tyerrtye arrpenhe areye arrekantherre akwetethe ahele-irreme,

arrenhantherrenhe uterneme akurne mpwaretyeke arrkernemele. Itnenhe irlpe artepele awerrirraye, nhenge akurne akngerre yanhe arrekatherre irrerlenge. Kenhe arrantherre akenhe Jesus arratyete itelaremele akwete, arrantherre rltterke akwete anemele.

<sup>5</sup> Nhenge tyerrtye arrpenhe areye arrekatherre ahele-irremele aneme, arlkarentye-irremele arrekatherre, kenhe arrantherre rltterke akwete-arle anerlenge. Itnenhe irlpe artepele awerrirraye. Nhenhe ikwerele, anwerne akaltye aneme nhenge Ngkarte arratyete anthurre anerlenge, Re anteme tyerrtye areye arratyete anthurre akalkelhe-iletienhe. Re arrekatherre alakenhe angketyenhe, “Nhenge arrantherre Ayenge Alartetye akeme alakenhe ikwerenge-arle akurne areye arrekatherre irremenge. Nhenhe ikwerele ureke arrantherre akwete-arle atyenge arratyete mwerre anerlenge. Arratyete anthurre-arle, arrantherre atyinhe akwete aneme. Alakenhe ikwerenge anteme Ayenge Alartetye arrekatherrenhe akwete-ante aneme.” Alakenhe rarle Ngkarte angketyenhe arrekatherre.

<sup>6</sup> Ngkartele arratyete anthurre-arle nhenge nthakenhe-arle Re anwernenhe akalkelhe-iletienhe-arteke. Areke-arle iperrenge nthakenhe-arle arrpenhe areyele arrekatherrenhe akurne mpwarerlenge, arrekatherre ahele-irremele, Ngkartele itnenhe arriletienhe itneke ahele-irritnemele. <sup>7</sup> Re arrenhantherrenhe akwetete mwantye anthurrele arntarnte-aretienhe, arrenhantherrenhe akurne-ketye akayake-iletienhe, Re anwernenhe mwantyele arntarnte-aretienhe anteme. Nhenhe areye-arle irretienhe nhenge Jesus Christ alkere-arenye ikwerenhe areye-akerte akertne-ngentyele arratemele ahelhe nhenhe-werne apetyalperlenge. Nhenge re apetyalpemele alkere-

arenye atningke anthurre-akerte, itne rltterrke anthurre anetyenhe, ure alknгентhele itnenhe utepe-aketyenhe. <sup>8</sup> Arratye apelaye, nhenge Jesus apetyalpemele ure akngerre-akerte, Re akalkelhe-ilemele atwetyenhe yanhe areye Ngkarteke-arle akangkwe-irretyakenhe, yanhe areye-inpe nhenge Ayeye Mwerre Jesus-akerte-arle arratye itelaretyakenhe. <sup>9</sup> Alakenhe ikweringe anteme, Re itnenhe arnterre anthurre atwetyenhe. Re imerte itnenhe aywepemele Ikwere-ketye akwete-ante akalke-akalke anetyeke. Re rltterrke anthurre, itnenhe aywepeke-arle iperrenge itne Ikwere-werne-atheke awethe utepe-irretyakenhe aneme. Yanhe ipenhe anteme itne aretyakenhe alknгентhe mwerre akngerre Ngkarte-kenhe pwarrryerlenge alkerenge, alknгентhe Ikweringe-ntyale-arle pwarrryemeke. Ngkarte itne-ketyenge akwete-ante untyeme-irretyenhe. <sup>10</sup> Alakenhe-irretyenhe ilengare apeke Jesus Alartetye apetyalperlenge, anwerne akangkemele anetyeke renhe utyernemele tnaketyeke nhenge anwerne-arle Ikwerenhe anemenge. Nhenge anwerne Renhe aremele, yanhe areye renhe-arle arratye itelaremeke, anwerne ingkirreke akangkemele arlkemele anteme renhe utyernemele tnaketyenhenge. Arrantherre-arle arratye itelaremeke iwenhe anwerne angkekenge, arrantherre yanhele anetyenhe anteye nhenge anwerne ingkirreke arlkemele alyelherlenge Ikwere-werne-atheke. Anwerne apatewarretyenhe rarle pwarrryerlenge anthurrenge.

<sup>11</sup> Kele anwerne Ngkarteke angkeme arrekantherre ingkirrenyeke. Ngkartele arrenhantherrenhe akngakeke itelaraye. Anwerne arrenhantherrenhe akwete apayuth-neme Ikwere arratye mwerre anetyeke. Alakenhe ikweringe anteme Re arrenhantherrenhe akngakemele ineke nhenge arrantherre akwete-arle Ikwere arratye mwerre

anetyeke. Arrantherre Renhe kele arratye itelareme, arrantherre Ikwere aywerrke anthurre mwerre anetyeke. Alakenhe ikwerenge anteme anwerne Ngkarte apayuth-neme arrenhantherrenhe rlterrke-iletaye akwete-ante arrenhantherrenhe atnerre-iletaye Ikwere mwerrantye akwete anetyenhenge. <sup>12</sup> Alakenhe-arle anwerne apayuthneme, nhenge arrpenhe areyele arrenhantherrenhe arerlenghe mwerrantye anerlte-aneme, itne Jesus Christ Alartetye utyernemele anthurre tnaketyeke. Kenhe Jesus-ele anteme arrenhantherrenhe aremele angkeme, "Alakenhe-arle mwerre anthurre." Alakenhe-irretyenhe Ngkarte uthene Jesus Christ uthenele-arle arrenhantherrenhe rlterrke Ikwere-atherrenhe antherlenghe.

## 2

*Arrentye Satan-eke-amparre apetyeme Jesus-enge arrwekele*

<sup>1</sup> Atyewe Ngkarte-arenye anwerne-kenhe areye, anwerne angketyeke ilengare-arle Jesus Christ Alartetye apetyetyenheke. Re arlte anyentele apetyetyenhe anwernenhe ingkerrenyeke anthurre apurtelhe-iletaye Ikwerele-arlenghe anetyeke. Alakenhe renhe anteme anwerne arrekantherre Ikwere-akerte iletaye. Anwernenhe awerrirraye. <sup>2</sup> Kenhe tyerrtye arrpenhe areye akutne-arle aneme arlte impene yanhe-akerteke. Alakenhe ikwerenge anteme arrantherre arnterre itirremele atere-irremele anteye. Arrpenhele akwele arrekantherre ayeye apale-apale ileke nhenge ayeye yanhe akwele Utnenge Mwerre-ngentye akwele. Itne apeke angkeme anwerne-akerte anwerne-arle akwele ayeye arrpenhe intelhe-ilemele yerneke Jesus-akerte nhenge ilemele Jesus-arle akwele kele apetyekenge

akwele. Itne anteme angkeme anteye Jesus-arle akwele kele ahelhe akngerre nhenhe-werne apetyalpeke-arle akwele. Yanhe alakenhe arratye anetyakenhe. Jesus apetyetyakenhe akwete, arrangkwe-arle. <sup>3</sup> Angwenhele apeke arrekantherre alakenhe urrtiyirremele ileme, renhe awetyale anetyeke, ikwere-ketye untyeme-irremele anaye. Urreke Jesus apetyalpetyehenge, tyerrtye atningke anthurre Ngkarte-ketye mwernte-irretyenhe Ikwere-ketyenge untyeme-irremele. Ikwere iperrengge artwe Arrentye Satan-kenhe-arle anemeke re apetyetyenhe, kenhe Arrentye Arnterte Anthurre arritnye. Kele imerte urreke awerne Ngkartele Arrentye Arnterte Anthurre ure alkngenthe akngerreke iwetyenhe akwete-ante. <sup>4</sup> Nhenge Arrentye Arnterte yanhe ahelhe akngerre nhenhe-werne apetyemele, re ayeye areye akurne-iletienhe, urrtiyirremele iletienhe itneke-akerte, arrawe-irrentye arrpenhe areyeke-arlike nhenge tyerrtye areyele-arle apenteme-akerte nhenge Altyerre ipenhe areye-arlike-akerte akwele. Re anteme akngerre anthurre akwele akelhetyenhe arrpenhe areyenge akngerre ulkere. Nhenhe ikwere ipenhe Arrentye Arnterte nhenhe Tyatye Akngerre ikwerele anetyenhele. Re anteme imerte Ngkarte anteme akwele ilelhemele. <sup>5</sup> Arrantherre-ame itelareme ayeye yanhe the arrekantherre ileke arrule anthurre? The arrekantherre ikwere-akerte ileke, Arrentye Arnterte anthurre arritnye, nhenge ayenge-arle apmere arrekantherrenge anekenge.

<sup>6</sup> Lyete anteme arne iwenhe apekele renhe arrkngerte-ileme arratetyeke. Arrantherre kele akaltye aneme arne nhenhe ikwere iwenhele-arle renhe arrkngerte-ileme anwerneke arratetyeke. Nhenge Ngkarte kele mpwarelherlenge. Re Arrentye Arnterte anwerneke imernetyenhe. <sup>7</sup> Kenhe anwerne akenhe Arrentye Arn-

terte renhe aretyakenhe-arle, anwerne ikwere-akerte kele akaltye ware aneme. Rarle tyerrtye atningke Ngkarte-ketye kele untyemelhe-ileke. Lyete anteme arpenhe mwerrele Arrentye Arnterte renhe arrkngerte-ileme arrateketye. Ikwere ipenhe anteme, renhe-arle arrkngerte-ilemeke ipenhe Ngkartele renhe akngetyenhe apmere ahelhe akngerre nhenhenge-ntyale. Ikwere ipenhe anteme, Arrentye Arnterte imernelhetyenhe anwerneke. <sup>8</sup> Nhenge Arrentye Arnterte apetyerleng, Jesus-ele renhe ilwetyeke-ante atwetyenhe. Re anteme renhe atwetyenhe nhenge angkentye ikwerenhele ware. Nhenge Jesus apetyalpemele, Re Alkngenthe Ikwerenhe mwerre-akerte apetyetyenhe akngerrele artyernerleng, Re apetyalpetyenhe ngangkere akngerre Ikwerenhe-akerte, ngangkere akngerre Ikwerenhele Re akurne ingkirreke akethe-ante arrernetyenhe. <sup>9</sup> Yewe, alakenhe arratye anthurre. Nhenge Arrentye Satan-ele Arrentye Arnterte yernemele, re renhe ngangkere ikwerenhe akwele anthetyenhe. Ngangkere ikwere-akerte akwele re apetyeme nhenhe-werne. Kele imerte re alhemele apmere arrpe-anenhe-werne nhenge ngangkere ikwerenhele-arle akwele iwenhe apeke renhe areye mpwarerle-apetyeke. Kenhe tyerrtye areye akenhe apatewarretyenhe anthurre arne ingkirreke rarle mpwarerleng. Nhenge tyerrtye areyele renhe aremele, itne imerte ikwere arlkemele re Ngkarte-arteke akwele anerleng itneke. <sup>10</sup> Ngangkere akurne yanhe-akertele anteme re itneke urrtiyirremele itnenhe iwerre akurnele akngetyeke. Kenhe ikwere ipenhele Ngkartele itnenhe ayweperleng-arle akwete-ante. Kenhe tyerrtye areyele apeke Ayeye Mwerre Jesus-akerte arratye itelaretyeke, kenhe Ngkartele anteme itnenhe mwantyele-arle arntarnte-aremere. Kenhe tyerrtye nhenhe areye

akenhe Ayeye Mwerre nhenheke akangkwe-irretyakenhe, itne imerte ayeye nhenhe renhe akwenpele ware awe-meke, itne renhe arratyete itelaretyakenhenge-arle, itne imerte ilerremele urrtiyirrentye ware akwele. Kele alakenhe ikwerenge anteme Ngkartele itnenhe aywepeme. <sup>11</sup> Alakenhe arratyete anthurre. Nhenge itne awemele, Ayeye Mwerre nhenhe renhe arratyete itelaretyakenhe Jesus-akerte. Alakenhe ikwerenge anteme Ngkartele itnenhe mwernte-iletete akurrkngwe itnekenhe aparlpe-aparlpe-irreme-arle, kele imerte itne akurne anteme itelaretyenhenge. Ikwere ipenhele imerte, itne Arrentye Arnterte renhe anteme awemele anteme itneke re urrtiyirremele ilerlengwe. <sup>12</sup> Angwenhele apeke Ayeye Mwerre nhenhe renhe arratyete itelaretyakenhe Jesus Christ-akerte, yanhe ikwerenge anteme Ngkartele itnenhe atwetyenhe. Kenhe tyerrtye yanhe areye, arratyete itelaretyakenhe-arle, akangkentye akwete-arle apale alherlte-iwemele, itirretyakenhe anemele, akurne mpwaretyete ahentye-aneme akwetethe, alakenhe ikwerenge anteme itnenhe atwetyenhe akwete.

*Ngkartele Thessalonica-arenye areye akngakeme nhenge Re itnenhe mwantyele arntarnte-aretyete*

<sup>13</sup> Atyewe Ngkarte-kenhe anwerne-kenhe areye: Jesus Alartetyete arrekhantherre ahentye anthurre aneme. Arrule anthurre nhenge urreke Ngkartele-arle arne ingkirreke mpwaretyenhenge, Re arrenhantherrenhe akngakeke akurne-ketyenge akayake-iletetenhe, arrenhantherrenhe ingkerrenyeke mwantyele arntarnte-aretyetenhe. Re arrenhantherrenhe akngakeke nhenge arrantherre Renhe apentetyenhenge. Re arrenhantherrenhe Utmenge Mwerre Ikwerenhe antheke Rarle arrenhantherrenhe arrekwele-irretyete.

Re arrenhantherrenhe mwantyele arntarnte-areme arrantherre-arle Ayeye Mwerre Jesus-akerte arratyete itelarekenge. Lyete anteme Utnenge Mwerre arrenhantherrenhe akaltyele-antherle-aneme arratyete mwerre anerrirretyeke. Alakenhe ikwerenge anteme Ngkartele arrenhantherrenhe itethe-iletienhe arlite ingkernenge. Alakenhe ikwerenge anteme anwerne Ngkarte akwete utyernemele tnaketyeke arrekantherre ingkirrenyekeke. Nhenhe anwerne mpwaretyeke arratyete. Anwerne Ngkarte utyernemele tnakeme anthurre arrekantherre ingkerrenyekeke. <sup>14</sup> Alakenhe anteme arratyete anthurre Rarle arrenhantherrenhe akngakeke nhenge Re arrenhantherrenhe mwantyele arntarnte-aretyeke. Alakenhe ikwerenge anteme Re anwerneke Ayeye Akngerre nhenhe yerneke anwerne-arle arrekantherre iletienhenge. Jesus anwerneke-artweye Ngkartenge akwete-ante aneme, alakenhe mwerre anthurre-arle. Ngkartele arrenhantherrenhe akngakemele ineke nhenge arrantherre anteme Jesus-arteke anteme anetyenhenge nhenge arrantherre anteme Ngkartenge akwete-ante anetyenhenge. Ngkartele Jesus Christ utyerneke, arrenhantherrenhe utyernetyenhe anteye. <sup>15</sup> Atyewe Ngkarte-kenhe anwerne-kenhe areye, rlterrke akwete tnerrirraye Jesus anwerneke-artweyeke, renhe apenterlte-apaye. Ayeye yanhe-arle anwerne arrekantherre arrekwelenge ileke, renhe arratyete itelaretyeke akwete. Ayeye nhenhe-inpe awemele akwete anwerne-arle arrekantherre intelhe-ilemeke pipe nhenhenge. Arrpenhe areye awerrirretyale nhenge itne arrenhantherrenhe ayeye arrpenhe arrkernemele akaltyele-antherlengenge. <sup>16-17</sup> Ngkarte uthene Jesus Christ uthene anwerneke ahentye anthurre aneme, anwernenhe mwantyele arntarnte-arerle-



anerremele. Ngkartele anwernenhe rlterrike-ileme anwerne atere-irreme-ketye. Alakenhe ikwerenge anwerne akaltye anteme aneme nhenge anwerne-arle ilwemele, anwerne imerte itethe-irritnetyenhe awethe ikwerenge-arle. Alakenhe ikwerenge anteme anwerne akwete Jesus Christ-eke angkemele Ngkarteke anteye Re-atherre arrenhantherrenhe rlterrike akwete atnyenetyeke nhenge arrantherre atere-aterere akwete ware aneketye. Nhenhe ikwere ipenhele anteme arrantherre arratyete itelaretyenhe mwerre ware anteme angkemele anetyenhenge.

### 3

*Paul uthene atyewe ikwerenhe atherre uthenele Ngkartekenhe areye apmere Thessalonica-le apayuthneme Ngkarteke akwete angketyeke itneke*

<sup>1</sup> Atyewe Ngkartekenhe anwerne-kenhe areye, Ngkarteke akwete angkaye anwerneke. Renhe apayuthnaye, anwerne iparrpe alhetyeke itneke Ayeye Mwerre Jesus Christ-akerte iletetyeke, nhenge tyerrtye atningke anthurrele anwernenhe awetyenhenge nhenge anwerne itneke ilettyenhenge Jesus Christ-akerte nhenge apmere arrpe-anenheke. Ngkarte itneke apayuthnaye nhenge itne awemele ayeye nhenhe arratyete itelarerrirrettyenhenge arrantherre-arle aneme-arteke.

<sup>2</sup> Tyerrtye arrpenhemele-arle arratyete itelaretyakenhe akwete-arle nhenge anwerne itneke ilerlenghe. Tyerrtye yanhe areye-arle akurne anthurre aneme ikerlthe-irremele akwele itne aneme, itnekenge ware anteme akwete Ngkarte apayuthne anwernenhe mwantyele arntarntearetyeke.

<sup>3</sup> Atyewe Ngkartekenhe anwerne-kenhe areye, Jesus Christ anwernekenge akwetethe aneme anwernenhe

impetyakenhe, re mpwaretyenhe iwenhe rarle angkeke mpwaretyeke. Re arrenhantherrenhe atnerre-iletayeke mwantyele akwete arntarnte-aremele Arrentye Satan-ele arrenhantherrenhe akurne mpwaretyeke uternekeye.

<sup>4</sup> Arrantherre kele Ngkarte-kenhe areye aneme. Arrantherre kele Jesus Christ renhe arratye itelareme, Ikwere alknngwirretyakenhele. Arrwekele-arle anwerne ayeye yanhe arrekantherre ileke nhenge ayeye renhe-arle anwerne intelhe-ileke-arlke pipe nhenheke, anwerne itelareme nhenge arrantherre-arle iwerre renhe apentemele, arrantherre-arle akwete apentetyenhe.

<sup>5</sup> Anwerne Jesus Anwerneke-artweyeke angkemele Re arrenhantherrenhe akaltyele-anthetyenhenge awethe-ame-awethe Ngkarte-akerte. Nhenhe ipenhe arrantherre akaltye anetyenhenge nhenge Ngkarte arrekantherre ingkirrenyekeke ahentye anthurre aneme. Anwerne Ikwere akwete angkemele nhenge arrantherre rlterrke anthurre anetyenhenge Jesus-arteke tyerrtye ingkirrekeke-arle mwerre anthurre anekeke, nhenge tyerrtye arrpenhe yanhe areyeke renhe-arle akwete uternemeke. Ikwere iperrenge anteme arrantherre mwerre anetyeke tyerrtye arrpenhe areyeke nhenge itne arrenhantherrenhe akwete uternerlengge apeke ahele-irrerlengge apeke arrekantherre.

*Anwerne Ngkarte-kenhe areye arnterre warrke-irretyeke*

<sup>6</sup> Anwerne-arle warrkene Jesus Christ-kenhe areye-arle. Alakenhe ikwerenge anteme arrantherre arnterre mpwarerlte-anetyeke. Anwernenhe mwantye anthurrele awerrirraye! Anwerne aweke tyerrtye arrpenhe areyele-arle akwele warrke-irretyeke ahentye-anetyakenhe. Nhenge tyerrtye angwenhe apeke apurrke-irremele aneme arrekantherrele-arlengge urrkapetyakenhe,

ikwerele-arlenge anetyale-arle! Tyerrtye yanhe areye-arteke apele iwerre mwerre renhe apentetyakenhe-arle nhenge anwerne-arle itnenhe akaltyele-anthemeke. <sup>7</sup> Arrantherre anwernenhe itelareme nhenge anwerne arrekanttherrele-arlenge anerlenge apmere arrekanttherrenhenge. Anwerne apurrke-irretyakenhe aneke, arrangwe-arle. Anwerne arnterre anthurre urrkaperlte-aneke arrantherre anteme anwernenhe mwerrentye apentetyenhenge. <sup>8</sup> Nhenge anwerne merne arrpenhe-kenhe arlkweke, anwerne apwerte ngkweltye akweke itnenhe anthemele. Kele anwerne urrkaperlte-anetyakenhe anteme apeke, kele anwerne arrenhantherrenhe-arle ngkweltyeke apayuthnemere. Alakenhe ikweringe anteme anwerne arnterre anthurre urrkaperlte-aneme arlte arrpe-anenhele, ingwe arrpe-anenhele. <sup>9</sup> Anwerne akngerrepate areye akwete aneme. Anwerne-arle arrenhantherrenhe akwete uternemere anwernenhe apwerte mane anthetyeke. Kele nhenge alakenhe irreketye, anwerne arnterre anthurre urrkaperlte-aneke nhenge arrantherre anwernekenge akaltye-irretyenhenge arraty mpwaremele mwerre anetyenhenge anteye. <sup>10</sup> Nhenge anwerne arrekanttherrenge aneke apmere arrekanttherrele-arlenge, ayeye nhenhe-arle anwerne arrekanttherre ileke, nhenhe anteme re: Angwenhe urrkaperle-anetyakenhe renhe merne anthetyale nhenge re arrenhantherrenhe apayuthnerlenge.

<sup>11</sup> Yewe, alakenhe arraty anthurre. Anwerne ayeye arrekanttherre-akerte aweke-arle nhenge arrpenheme-arle warrke mpwareketye. Anwerne aweke-arle antime yanhe areye warrke-irretyeke ahentye-anetyakenhe-arle tyele angkerlte-anemele akwete, itne arrpenhe areyeke iterele warrke-irreme itnenhe apatelhe-

ilemele. <sup>12</sup> Anwerne apele warrkene Jesus Christ-kenhe areye. Alakenhe ikwerenge anteme anwerne ayeye rltterke anthurre renhe ileme tyerrtye arrpenhe yanheke arrpenhe areyeke-arle tyele angkemeke itnenhe apatelhe-ilemele, warrke-irretyakenhe anteye. Itne arnterre anthurre urrkaperlte-anetyeke merne uthene apwerte utheneke.

<sup>13</sup> Atyewe Ngkarte-kenhe anwerne-kenhe areye, arrantherre apeke-arle apurrke anteme awelhomele. Kenhe arrantherre arrpenhe areye mwantyele arntarnte-aretyeke akwete-arle.

<sup>14</sup> Kele arrpenhe Ngkarte-kenhele apeke akiwarre-irremele pipe nhenheke anwerneke-ngentyele nhenge urrkaperlte-anetyakenhe, kele renhe alkngetherre ilaye tyerrtye arrpenhe areyenge. Ikwere-ketye arlengenge anetyeke anteme re imerte apure-irrerlengge, akngarte-iwelhetyenhenge. <sup>15</sup> Tyerrtye yanhe re Ngkarte-kenhe akwete aneme, re atyewe arrekantherrenhe akwete anemele. Ikwere akangkemele anaye. Ikwere akwete angkemele urrkapetyeke alpetyenhenge.

*Paul-ele anteme pipe nhenhe renhe intelhe-ileme uyerrelhe-ilemele*

<sup>16</sup> Jesus Christ-ele tyerrtye areye atyenpelhe-ileme. Anwerne Ikwere angkeme arrekantherre nhenge Re arrenhantherrenhe akwetethe atyenpelhe-iletienhenge nthenhe-werne re apeke arrantherre alherlte-iweme. Anwerne Ikwere angkeme Re arrekantherrele-arlengge akwete-ante anetyeke.

<sup>17</sup> Ayenge Paul angkeme arrekantherre ayenge-arle mwerre aneme. Ayenge alakenhe akwete angkeme ayeye atyinhe areye intelhe-ilemele iltie atyinhele. Nhenge arrantherre pipe nhenhe renhe aremele kele arrantherre akaltie anetyeke tharle intelhe-ilekenge. <sup>18</sup> The Jesus

2 Thessalonians 3:18

13

2 Thessalonians 3:18

Christ Anwerneke-artweye apayuthneme arrenhanther-  
renhe akwete mwantyele arntarnte-aretyeke. Kele.

Angkentye Mwerre  
Portions of the Holy Bible in the Central and Eastern Arrente  
language of Australia

copyright © 2002-2014 Wycliffe Bible Translators

Language: Eastern Arrente (Arrente, Eastern)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-05-14

---

PDF generated using Haiola and XeLaTeX on 12 Jun 2019 from source files dated 5 Mar 2019

26bd077a-984c-5596-a099-f37f2651f363